

Perbelanjaan mereka naik sejak beg plastik dikenakan caj

Mahasiswa bantah

Oleh SITI ROHAIZAH ZAINAL

pengarang@utusan.com.my

■ SHAH ALAM 29 JAN.

KEMARAHAN orang ramai terhadap caj 20 sen bagi setiap beg plastik yang dikuatkuasakan Kerajaan PKR Selangor kini semakin merebak dengan yang terbaharu melibatkan golongan mahasiswa selepas perbelanjaan harian mereka meningkat sejak 1 Januari lalu.

Bantahan itu dibuat kerana mereka merupakan antara golongan yang paling terkesan dengan caj tersebut, memandangkan hampir keseluruhan mahasiswa di Selangor bergantung sepenuhnya kepada pinjaman Perbadanan Tabung Pendidikan Tinggi Nasional (PTPTN) bagi menampung perbelanjaan harian.

Suara hati golongan mahasiswa tersebut mempunyai merit yang wajar didengari oleh kerajaan negeri memandangkan Selangor menempatkan puluhan universiti awam dan swasta dengan jumlah pelajarnya juga mencakah puluhan ribu orang.

Tampil mewakili suara mahasiswa, Yang Dipertua Majlis Perwakilan Pelajar (MPP), Universiti Putra Malaysia (UPM), **Mohamad Ameerul Ishak** berkata, selaku golongan terpelajar, mereka pelik melihat tindak-tanduk Kerajaan PKR Selangor yang terburu-buru mengenakan caj 20 sen.

Menurut Mohamed Ameerul, sepatutnya Menteri Besar, Datuk Seri Mohamed Azmin mengambil pandangan rakyat terlebih da-

IPT UTAMA DI SELANGOR

UNIVERSITI AWAM

- > Universiti Teknologi Mara (UiTM)
- > Universiti Islam Antarabangsa Malaysia (UIAM)
- > Universiti Putra Malaysia (UPM)
- > Universiti Kebangsaan Malaysia (UKM)

UNIVERSITI SWASTA

- > Universiti Selangor (Unisel)
- > Universiti Multimedia (MMU)
- > Universiti Pengurusan dan Sains (MSU)
- > Universiti Tenaga Nasional (Uniten)
- > Kolej Pusat Teknologi dan Pengurusan Lanjutan (PTPL)
- > Kolej Universiti Islam Antarabangsa Selangor (Kuis)
- > Universiti Kuala Lumpur (UniKL)
- > German-Malaysian Institute (GMI)

* Sebahagian daripada IPT di Selangor

hulu sebelum menguatkuasakan apa juga dasar kerana apa gunanya kempen kelestarian alam sekitar, jika orang ramai khusus-

nya mahasiswa pula yang terbeban dengan caj tambahan.

"Walaupun 20 sen ini nampak seperti kecil tetapi bagi kami mahasiswa (yang tidak bekerja dan hanya bergantung kepada pinjaman PTPTN), caj 20 sen ini mengganggu kos perbelanjaan harian," katanya kepada *Utusan Malaysia* di sini hari ini.

Kerajaan PKR Selangor menguatkuasakan caj 20 sen ke atas penggunaan setiap beg plastik sejak 1 Januari lalu sehingga mengundang kemarahan orang ramai tetapi rintihan rakyat itu seolah-olah tidak dipedulikan Mohamed Azmin yang lebih gemar bersikap lepas tangan.

Pandangan sama turut disuarakan Yang Dipertua MPP Universiti Teknologi Mara (UiTM), **Muhammad Aidil Faizin Mohd. Mazni** yang mendesak Mohamed Azmin dan kepimpinan kerajaan negeri agar bersikap telus dalam soal caj 20 sen terutama ke mana duit itu dibelanjakan.

Katanya, golongan mahasiswa menyokong penuh apa jua usaha untuk menjaga alam sekitar, tetapi membebankan pengguna sehingga menyebabkan pelajar sepertinya terpaksa mengeluarkan perbelanjaan lebih adalah kesilapan yang tidak boleh di pandang sepi oleh sesiapa sahaja.

"Sekiranya mereka serius, perkenalkan atau sediakan beg mesra alam sekitar tetapi persoalannya mengapa caj ini dikenakan dan ke mana wang itu nanti hendak dibelanjakan? Kerajaan negeri mestinya bersikap telus dalam hal ini, jangan cuba berselindung," katanya.